



### ԴԵՊԻ ՓՐԿՈՒԹՅՈՒՆ (Մեծ եղեռնի 80-ամյակի առթիվ)

«Եւ մի՛ տանիր զմեզ ի փորձութիւն,  
այլ փրկեա զմեզ ի չարէն»:

Գրիգոր Աբրահամյանի ընտանիքը խիստ իրարանցման մեջ էր: Տունը, որ երկհարկանի էր և ուներ իր, համեստ կահավորումն ու մի փոքրիկ այգի, խառնափնթոր վիճակում էր: Սենյակների և տան բոլոր մասերում թափված էին ամեն ինչ. անկողին, հագուստեղեն, աթոռներ... Բացի ընտանիքի տղամարդուց՝ Գրիգորից, որն աշխատում էր Վանի Օրիորդաց վարժարանում որպես վերակացու, բոլորը տանն էին. Սաթենիկը՝ Գրիգորի կինը, և երեք երեխաները՝ յոթ տարեկան Վազգենը, հինգ տարեկան Քարմիլեն ու երեք տարեկան Վարազդատը: Նրանք հագնված էին և կարծես պատրաստվում էին հյուր գնալու: Սակայն դիտողի աչքից չէր վրիպի, որ այս ընտանիքին արտակարգ և արտասովոր անակնկալ է սպասվում:

Հուլիս ամիսն էր, օրը՝ պարզ և շոգ: Կեսօր էր: Սաթենիկն անհանգիստ դուրս ու ներս էր անում: Զգացվում էր, որ նա սպասողական դրության մեջ է: Հանկարծ դուռն ուժգնությամբ բացվեց և ներս մտավ Գրիգորը՝ ալլալված և չափազանց անհանգիստ հոգեվիճակում:

— Տղա՛,— անմիջապես ամուսնուն դիմեց Սաթենիկը,— ի՞նչ ի կասեն:

— Ինչ ի կասեն ո՞րն ի,— վրա բերեց Գրիգորը,— Վանի իշխանավորներ ծածուկ են պախե վերևից էկած գաղթի հրաման, որպեսզի ժամանակ ունենան ուրանց ունեցվածք ծախեն և հետո միայն այդ մասին հայտնեն ևս խեղճ ժողովրդին: Եթե ժամանակին հայտնեին ևս մասին, մենք մկա վաղո՞ւց հեռացիր էինք քյաղքեն:

— Քյաղքի մեծ մասն արդեն հեռացիր են,— ասաց կինը,— մնացիր ենք մենք և մի քյանի տուն:

— Թուրքն արդեն քիչ ի մնացե, որ մոտենա քյաղքին: Վան պիտի տատարկվի մինչև իրիկուն: Լաճեր պատրա՞ստ են:

— Խա,— պատասխանեց Սաթենիկը:



—Անապարեք տուս կյանք: Լուսամուտներ պիճո՞ւ փակի՞ր ես,—շուրջը նայելով վրա բերեց Գրիգորը:— Վերցրու ամենից անհրաժեշտ պաներ: Մնացածներ մեզ պետք չեն: Կասեն շուտով ետ կուկյանք: Բայց խելքս պան չի կտրե: Էս խմոր շատ ճուր կառնի:

Գրիգոր Աբրահամյանի ընտանիքը ո՛չ ձի ուներ, ո՛չ լծկան եզ, ո՛չ սալ, որ ունեցվածքը բարձե՛ին: Նրանք ունե՛ին մի կթան կով, որի վրա էլ բարձեցին իրենց համար խիստ անհրաժեշտ իրերը, հագուստեղենը, սնունդը և այլ պարագաներ:

Կեսօրից բավականին անցել էր արդեն, երբ նրանք, ավարտած համարելով իրենց պատրաստությունները, դուրս եկան տանից, փակեցին դուռը, բանալին դրեցին իրենց համար հայտնի և սովորական տեղում ու միացան գաղթականների անվերջանալի շարանին՝ հույսով լի սակայն, որ շատ շուտով նրանք կրկին կվերադառնան իրենց հարազատ օջախ:

Փոքրիկ Վարազդատին շալակել էր Սաթենիկը, Քարմիլեին՝ Գրիգորը, իսկ Վազգենը նստել էր կովին բարձած իրերի վրա:

Նրանք բավականին հեռացել էին քաղաքից, երբ շուկներ լսվեցին, թե թուրքը շատ մոտ է: Պետք էր շտապել:

— Մարե,—մերթ ընդ մերթ ճանապարհին լացակումած տոնով մորն էր դիմում Վազգենը,—ո՞ր ի կեթանք:

Շփոթված մայրը չէր կարողանում պատասխան գտնել:

— Շուտով ետ կուկյանք մեր տուն, լո՛ւսս,—փաղաքշական տոնով և գլուխը շոյելով հանգստացնում էր մայրը,—մի լա:

Վանի գաղթականների անծայրածիր շարասյունը, ո՛րը ֆայտոնով, ո՛րը սալով, ո՛րը ձիով, ո՛րը էշով կամ կթան կովով, ո՛րը ոտքով, քայլում էին օրերով դեպի փրկության ափ, դեպի Արևելյան Հայաստան, դեպի Վաղարշապատ՝ Ս. Էջմիածին, սակայն իրենց սիրտն ու հոգին թողնելով իրենց հայրենի հարազատ օջախում:

Շուկները հաստատվեցին: Թուրքն արդեն մոտ էր հայ գաղթականների շարասյանը: Բոլորն անհանգիստ էին: Մի՞թե պետք է ընկնեն արյունախում թուրքի երախը, մի՞թե չեն փրկվելու: Բայց և այնպես ժողովրդի այդ անհանգստությունը մի փոքր մեղմանում էր, երբ նրանք տեսնում էին, որ իրենց շրջապատել են և ուղեկցում են և՛ զինված հայ կամավորներ, և՛ ռուս ու կազակ զինվորներ, որոնք ամեն վայրկյան պատրաստ են իրենց կյանքը զոհելու՝ հանուն գաղթականների փրկության:

Գաղթականների շարասյան միջից երբեմն-երբեմն լսվում էր սրտաճրմիկ մի երգ՝ «Դիւ յաման»:

Վերջապես հայտնվեց թուրքը, ինչպես ժանիքները սրած գազան: Բայց նրանք առայժմ չէին համարձակվում հարձակվել գաղթականների շարասյան վրա՝ նկատելով նրանց ուղեկցող սպառազինված խմբերին: Միայն ժամանակ առ ժամանակ թեթևակի կերպով «անհանգստացնում» էին իրենց հատ ու կենտ կրակոցներով: Բայց, այսուամենայնիվ, այսպես երկար չշարունակվեց: Նրանք սկսեցին թաքստոցներից, բլուրների ետևից, իրենց համար նպաստավոր դիրքերից պարբերաբար հրաձգային հերթեր տեղալ հայերի գլխին: Այդ պահին գաղթականների շարքերում սկսվում էր վայնասուն, խուճապ... Բայց պաշտպանական ջոկատները կանխում էին էր վերահաս արհավիրքը, անձնագոհաբար նետվում դեպի գիշատիչները և փախուստի մատնում նրանց: Բայց, այնուամենայնիվ, յուրաքանչյուր մարտից հետո, չհաշված երկու կողմերի կովոդների զոհերը, հայ գաղթական-



Անքի շարքերում լինում էին կորուստներ. զոհվում ու մահատակվում էին ծերեր, երեխաներ, պարմաններ ու պարմանուհիներ, որոնք դեռևս չէին հասցրել մտնել կյանքի լիարյուն հորձանուտ: Հարազատները չէին կարողանում թաղել իրենց զոհվածների՝ չկարողանալով ժամանակ գտնել և ապահովություն այդ ցավալի ու խիստ դառն աշխատանքի համար, և միաժամանակ շտապում էին՝ չկտրվելու համար ընդհանուր շղթայից և այդ շղթայի հետ էլ քայլել առաջ, քայլել դեպի փրկություն...

Գաղթականների շարասյունն աչքի էր ընկնում իր մասնատված, բայց ոչ՝ անջատված, հավաքականություններով, գերդաստան առ գերդաստան: Յուրաքանչյուր գերդաստան իր մեջ ներառնում էր մի քանի ընտանիքներ: Այդպես ավելի հարմար էր, որովհետև որևէ անակնկալի դեպքում միմյանց զորավիգ լինելը հեշտ էր:

Անցնում էին օրեր, շաբաթներ... Բայց փրկությունը դեռևս հեռու էր ու հեռու: Թուրքերը շարունակում էին պարբերաբար զինված հարձակումները գաղթականների շարասյան վրա՝ պատճառելով նրանց մեծաքանակ կորուստներ:

Գաղթականների մոտ աստիճանաբար սպառվում էր սնունդը: Մեծերը, ճիշտ է, մի կերպ դիմանում էին, սակայն անհուսալի էր վիճակը փոքրերի մոտ: Զգացվում էր, որ վրա է հասնում սովը: Դրան գալիս էր լրացնելու ման շոգը, հոգնածությունը, տառապալից անքուն գիշերները...

— Մարե,—նվաղած ձայնով հաճախ մորն էր դիմում Վազգենը,—սոված եմ, խաց կուզեմ:

Մայրը խնայողաբար մի-մի փոքրիկ կտոր հաց էր տալիս երեխաներին, որպեսզի կտրի նրանց նվնվոցը և կանխի նրանց նվաղումը:

Գաղթականների ականջներին ամեն լուսաբացի լսելի էր լինում մի ծեր քահանայի ձայն, որ երգում էր «Գթա, Տէր» շարականը:

Օրեցօր շոգը սաստկանում էր: Դրան հակառակ՝ գիշերներն էլ ցուրտ էր անում: Մարդիկ սկսում էին հիվանդանալ: Եվ քանի որ սնունդն էլ վերջանալու վրա էր, կամ շատերի մոտ արդեն վերջացել էր, գաղթականների շարքերում հաճախակի էին դառնում մահացությունները, ավելի հաճախ՝ երեխաների մոտ:

Ժամանակ առ ժամանակ շարասյան առջևից և ետևից լսվում էին հրամաններ.

— Արա՛գ, արա՛գ... շտապե՛ք...

Եվ այդ ձայնից քիչ անց հետևում էին թուրքերի կրակոցները: Նորից իրարանցում, վայնասուն... Եվ շարասյունը քանի գնում, նոսրանում էր...

Վերջին օրերը Գրիգորը և Սաթենիկը դարձել էին խիստ լուակյաց ու մտազբաղ, ավելի հաճախ՝ ջղագրգիռ: Նրանց չափազանց անհանգստացնում էր երեխաների վիճակը:

— Ախշի՛,—կնոջն էր դիմում Գրիգորը,—էն, ինչ որ ես ի կտիսնամ, էտը վերջ չկա: Ես կվախենամ, որ մեր էրեխեք մեր ծեռից էթան:

Երկու փոքրիկները շատ հաճախ էին նվնվում: Նրանց վիճակը շատ լուրջ էր: Իսկ Վազգենն էլ հաճախ էր կրկնում.

— Ես մեր տուն կուզեմ, ես մեր բախշեն կուզեմ...

Գրիգորի եղբայրը՝ Վարդանը, որի ընտանիքը նույնպես նրանց հետ էր գնում, տեսնելով եղբոր ընտանիքի վիճակը, հաճախ մոտենում էր նրանց և հուսադրող ու հանգստացնող խոսքեր ասում.

— Փրկություն հեռու չի, քիչ մնաց, կխասենք...



Բայց այդ փրկությունը շահն ու շատ հեռու էր:

Փոքրիկ Վարազդատը, որին ծնողները Վարեր էին կոչում, չդիմացավ այս տատապանքին, սովին ու շոգին: Ծնողները ոչինչ անել չկարողացան՝ փրկելու նրա կյանքը: Նա իր կարճատև անմեղ կյանքում կրեց մահատակության պատկը: Ծնողները մի կերպ մի, այսպես կոչված, փոս փորեցին և փոքրիկ Վարազդատի դին ամփոփեցին նրա մեջ:

Գրիգորը և Սաթենիկը շատ ծանր տարան այս բանը: Բայց ինչ արած, պետք էր փախչել, պետք էր փախչել՝ փրկելու համար ողջ մնացած մյուս երեխաներին:

Որոշ տարածություն գաղթականների շարասյունն անցավ առանց որևէ արտակարգ միջադեպի: Բոլորը կամաց-կամաց սկսում էին խաղաղվել: Նրանց արդեն թվում էր, թե ամեն արհավիրք վերջացել է, և իրենք հասել են փրկության ափ:

Բայց այս բոլորը խաբուսիկ անդորր էր: Ծուռով կրկին սև ամպեր կուտակվեցին գաղթականների շարասյան գլխին: Երեք կողմերից, բացի փախուստի ճանապարհը, հրացանային համազարկերով թուրքը սկսեց կրակել կարկուտ տեղալ հոգնած, հիվանդ ու հուսահատ գաղթականների վրա: Անասելի, ահավոր ու չտեսնված իրարանցում սկսվեց գաղթականների շարքերում: Մեր ու մանուկ կորցրել էին իրար: Մարդիկ փախչում էին ով որ կողմ կարող էր: Ուժասպառները և ծանր հիվանդներն ընկնում էին գետին՝ կրկին վեր կենալու հուսահատ ճիգեր թափելով: Բայց ապարդյուն... Սպանվածների դիակներն արդեն անհաշիվ էին:

Ցավով պետք է ասել, որ այս աղետալի պահին Գրիգորենց լծկան կովը, որի վրա էր բարձված ընտանիքի փրկության հույսը, առաջին իսկ կրակոցներից ուժգին ծառս եղավ, պոկվեց տեղից և վազեց դեպի մոտակա գետն ու ընկղմվեց նրա ջրերում: Բարեբախտաբար ծառս լինելու պահին փոքրիկ Վազգենն ընկավ գետին, եթե ոչ՝ նրա կորուստն անդառնալի կլիներ:

— Ամահ, բալեհ, — իրեն կորցրած նվաղած ձայնով աղաղակեց Սաթենիկը:

Այդ տեսնելով Գրիգորն ասես գերբնական ուժ ստացավ, ուստեց ու մի ակնթարթում երեխային իր գիրկն առավ: Բարեբախտաբար երեխան ոչ մի վնասվածք չէր ստացել:

Այս միջադեպին ականատես էր եղել մի ոռու զինվոր, որը մոտեցավ նրանց և, հանգստացնելով, ասաց.

— Дайте вашего сына я понесу, не беспокойтесь, я не покину вас.

Երբ Գրիգորը ոռու զինվորի խոսքերը հայտնեց կնոջը, վերջինս կրտրականապես հրաժարվեց:

— Իմ բալեն պիտի մնա իմ խեռ:

— Ախշի, — կնոջը համոզում էր Գրիգորը, — մեր լանու փրկության համար ի կասի:

Ռուս զինվորի և Գրիգորի երկար հորդորներից հետո, վերջապես, Սաթենիկը տեղի տվեց: Ռուս զինվորը փոքրիկ Վազգենին գրկեց, դրեց ձիու գավակին և ասաց.

— Не беспокойтесь, я вас найду.

Ինչպես կովը միանգամից և ընդմիջտ անհետացավ ջրի հորձանուտում՝ իր հետ տանելով դեպի փրկություն տանող նրանց ընտանիքի բոլոր հույ-



սերը, այնպես էլ Վազգենը ձիու վրա, որու գինվորի հետ միասին, մի ակնթարթում անհետացավ նրանց տեսադաշտից:

... Պաշտպանական ջոկատները ստիպեցին թուրքին լռելու: Այնուհետև սկսվեց մի փոքր դադարի շրջան: Առիթից օգտվելով, գաղթականների խումբը նորից շարժվեց դեպի առաջ: Փոքրիկ Քարմիլեին կրկին իր շալակն առավ Գրիգորը, և տանջահար ամուսինները միացան փախստականների շարանին: Նրանք այլևս ոչինչ չունեին իրենց մոտ՝ ո՛չ սնունդ, ո՛չ վերմակ, ո՛չ տաք ծածկոց և կամ այլ պարագաներ: Կովն այդ բոլորն անդառնալիորեն տարել էր իր հետ:

Անցնում էին օրերը, բայց փոքրիկ Վազգենից ոչ մի լուր:

Թուրքը համարյա չէր անհանգստացնում գաղթականների շարասյանը: Սակայն մի ահավորությանը եկել էր փոխարինելու մի այլ, առավել ահավոր աղետ: Սկսվել էր համաճարակ: Ինչպես եկեղեցում, աշտանակի վրա, հպարտորեն շողշողացող անհամար մոմերն ի վերջո հասնում են իրենց վերջին առկաջումին և վերջալույսին, ճիշտ այդպես էլ գաղթականների շարասյունն օրեցօր և աստիճանաբար նոսրանում էր ու նոսրանում: Մարդիկ սկզբում ծանր էին տանում դիակների ներկայությունը, սակայն վերջին օրերը նրանք արդեն համարյա անտարբեր էին դրանց հանդեպ: Գաղթականների անձայրածիր շարասյունից մնացել էր միայն մի փոքր խումբ:

Ծանապարհին այդ անհամար զոհ-նահատակներին գնաց միանալու մահ անմեղ փոքրիկ Քարմիլեն: Ծնողները խիստ հուսահատ վիճակում էին, երկու երեխաները գնացին անդառնալի, երրորդի ճակատագիրն էլ անհայտ է: Գրիգորն ու Սաթենիկն ամբողջ ճանապարհին համարյա չէին խոսում: Միայն Սաթենիկը երբեմն-երբեմն երկու ձեռքերը խփում էր ծընկերին և հառաչում.

— Վախ, վախ...

Այս հուսահատ վիճակում նրանք իրենց վերջին ճիգերն էին թափում՝ որտեղ և ինչ պայմաններում էլ լինի գտնել իրենց կորած որդուն: Մի՞թե որու գինվորը վերջնականապես ջնջեց կյանքի հետ կապող նրանց վերջին հույսը...

Գաղթականների շարքերում տարածվել էր մահ մուրացկանությունը: Համարյա դատարկված գյուղերի մոտով անցնելիս անգամ նրանք ոչինչ հայթայթել չէին կարողանում:

Սով էր ու համաճարակ...

Վերջապես, օրեր անց, կրկին հնչեց ծեր քահանայի ձայնը.

— Ի սեր և ի փրկութիւն ազգիս հայոց՝ զՏէր աղաչեցուք...

Գրիգորի գոտկատեղին մնացել էր մի քանի թուրքական ոսկեդրամ: Այն էլ խնայողաբար պահում էր ավելի մեղ օրվա համար:

Հոգով և մարմնով տառապյալ ամուսինները ինքնամոռաց ու համրաբայլ բնագոյորեն գնում էին ուժասպառ գաղթականների խմբի հետ: Հանկարծ վազքով, անսպասելի, նրանց է մոտենում մի փոքրիկ երեխա՝ ցեխոտված ու կեղտի մեջ կորած հագուստների մեջ: Գլխին դրված էր գինվորական մի գլխարկ, որն այնքան մեծ էր, որ ծածկել էր նրա դեմքը: Փոքրիկը բռնում է Սաթենիկի փեշերից և այդպես կախված մնում:

— Հեյ-վախ, — տեսնելով երեխայի խղճալի վիճակը, սրտի խորքից շշուկով արտաբերեց Սաթենիկը:

— Տղա՛, ի՞նչ կուգես, — փաղաքշանքով թափառական երեխային դիմեց Գրիգորը:



Ոչ մի ձայն:

— Տղա՛, տու հա՛մը ես,— բռնելով երեխայի թևը ասաց Գրիգորը:

Նորից ոչ մի ձայն:

— Մի կտոր խաց տուր էտա լանուն: Չե՛ս տիսնա, անտեր երեխա ի,  
— խղճահարությամբ ամուսնուն դիմեց Սաթենիկը:

Տղան կպել էր Սաթենիկի փեշերին և պոկ չէր գալիս:

— Առ էսա խաց, կեր,— հացի մի կտոր մեկնելով երեխային դիմեց Գրիգորը:

Բայց տղան համատորեն լռում էր:

Գրիգորի համբերությունը վերջապես սպառվեց: Նա ստիպված եղավ բարձրացնելու երեխայի գլխարկը, որպեսզի նրա դեմքը տեսնի: Երբ բարձրացրեց այն, նույն ակնթարթին ականայից չոքեց և գրկեց երեխային:

Իսկ փոքրիկի աչքերից առատորեն հոսում էին արցունքները:

Երբ փոքրիկը մի փոքր ուշքի եկավ, հագիվ լսելի ձայնով արտաբերեց.

— Մարե՛, հայրի՛կ... ես մեր տուն կուզեմ, ես մեր բախշեն կուզեմ...

Ես իմ քուր Քարմիլ կուզեմ, ես իմ ախպեր Վարեր կուզեմ:

Սաթենիկն ուշակորույս ընկած էր գետնին:

Գաղթականների փոքրաթիվ խումբը համարյա մոտ էր Վաղարշապատին՝ Սուրբ Էջմիածնին:

• • •

Դեպքերը տեղի են ունեցել 1915 թվականի հուլիս-օգոստոս ամիսներին: Պատումի փոքրիկ Վազգենը հայրս է: Փրկությունից հետո, 1918 և 1925 թվականներին, Աբրահամյանների ընտանիքում լույս աշխարհ են գալիս անմեղ նահատակներ Քարմիլեի և Վարազդատի անվանակիցները, որոնցից առաջինը ապրում է Երևանում, իսկ երկրորդը զոհվել է Երկրորդ համաշխարհային պատերազմում, 1944 թվականին:

Տարիներ անց հայրս պատմեց գաղթի մասին և շեշտեց, որ ռուս զինվորը իրեն ոչ թե հանձնել է ճակատագրի քմահաճույքին և հեռացել, այլ խստագույնս պատվիրել՝ նստել ճանապարհի եզրին, որտեղից անցնում էր գաղթականների շարասյունը, և սպասել մինչև ծնողների հայտնվելը: Ռուս զինվորը ստիպված է եղել այդպես վարվել և փոքրիկ Վազգենին թողնել այդ քիչ թե շատ ապահով տեղում, քանի որ ինքը մարտի է բռնվել թուրքերի դեմ պաշտպանական կռիվներին: Հորս փրկիչ այդ բարեհոգի զինվորի հետագա ճակատագրի մասին այլևս ոչինչ հայտնի չէ:

ՎՈԼՈՂՅԱ ԱՐՐԱՀԱՄՅԱՆ